



Ազգերի հիշողության մեջ հաղթանակները թողնում են անջնջելի հետք, և այս օրը մեր տոնացույցի փառավոր էջերից մեկն է: Մայիսի 9-ը խաղաղ ապրելու և արարելու, ինքնության և հարատևության համար պայքարող հայ ժողովրդի հաղթանակների խորհրդանիշն է: Մեր ժողովուրդը նշում է Հաղթանակի ու խաղաղության տոնը՝ Հայրենական մեծ պատերազմում տարած հաղթանակի 71 և Շուշիի ազատագրման 24-ամյակները: Մեր պատմության մեջ ոսկե տառերով գրված մայիսի 9-ը քաջարի հերոսների հիշատակը վառ պահելու և նրանց, ովքեր մեր կողքին են հարգանքի տուրք մատուցելու օրն է: Բյուրեղավան քաղաքում սկսած 2008թ-ից, երբ քաղաքապետ ընտրվեց Հակոբ Բալասյանը ձևավորեց ավանդույթ՝ ամեն տարի Հաղթանակի օրը կազմակերպել տոնական շքերթ, որին իր մասնակցությունն է ունենում ամբողջ քաղաքը: Այս մշակույթը կրկնվում է արդեն 8 տարի: Մայիսի 9-ի առավոտյան շքերթի մասնակիցները քաղաքապետ Հակոբ Բալասյանի և Բյուրեղավանի Հայրենական պատերազմի միակ վետերան, 95-ամյա Սոկրատ պապի գլխավորությամբ շարժվեցին դեպի քաղաքային հուշակոթող: Քաղաքապետարանի աշխատակազմը, ավագանին, հիմնական, ավագ դպրոցները, մարզադպրոցը, արվեստի դպրոցը, մանկապարտեզը, քաղաքային պոլիկլինիկան և հիմնարկների ներկայացուցիչները նրանց հետ հարյուրավոր բյուրեղավանցիներ՝ ՀՀ և Արցախի դրոշներով, պաստառներով ու փուչիկներով, հայրենասիրական երգեր հնչեցնելով հասան հուշակոթող, որտեղ տեղի ունեցավ շքեղ միջոցառում: Հայաստանի օրհներգով տրվեց միջոցառման մեկնարկը: Այնուհետև քաղաքապետ Հակոբ Բալասյանը ողջունեց բյուրեղավանցիներին, շնորհավորեց մայիսյան հաղթանակների կապակցությամբ.

<<Հաղթանակները նվեր չեն տրվում: Հաղթանակի համար անհրաժեշտ է պայքարել, արյուն թափել: Մեր հաղթանակները ձեռք են բերվել մեծ դժվարությամբ, ինչը պիտի պահենք, պահպանենք ու փոխանցենք մեր սերունդներին: Հավերժ փառք բոլոր զոհվածներին, առանձնահատուկ քաջությամբ պատերազմում զոհված մեր տղաներին>>- ավարտելով իր խոսքն ասաց քաղաքապետը, որից հետո մեկ րոպե լռությամբ հարգեցին զոհվածների հիշատակը: Այնուհետև օրվա հերոս Սոկրատ պապին հրավիրեցին բեմ, մեծարեցին, շնորհակալություն հայտնեցին Մեծ Հայրենականին իր մասնակցության համար: Բոլոր երգերն ու ձոները նվիրված էին մեր հայրենիքին ու մեր զինվորին: Արցախյան պատերազմում ևս մեծ մասնակցություն են ունեցել հարյուրավոր բյուրեղավանցիներ: Նրանցից շատերը վերադարձան, տասնյակները զոհվեցին: Վերջին իրադարձությունների ժամանակ ևս բազմաթիվ կամավորներ մեկնեցին սահման և մինչ օրս սահմանագծում են: Հարյուրից ավել ժամկետային զինծառայողներ, 30-ից ավել սպաներ այսօր պահում են մեր սուրբ հողը: Գրեթե ողջ քաղաքը հուշակոթողի մոտ էր, բոլորի տրամադրությունն ու ոգին բարձր էր: Բյուրեղավանցիների հետ էր նաև հայրենասիրական երգերի անգուգական կատարող Գրիգոր Համբարյանը: Բեմը թնդում էր խրոխտ երգերից, նրան էին միացել պատանի երկրապահները: Բյուրեղավանում տոնական միջոցառումն ավարտվեց փոքրիկների, հայոց հզոր բանակի ապագա զինվորներ՝ Հակոբի ու Արամի բեմելով, նրանք եռագույն փուչիկներ ու աղավնիներ ուղարկեցին երկինք: Բոլորի ցանկությունը մեկն է՝ խաղաղություն հայոց աշխարհին:

09.05.16.